

L Grop de le Mascre de Soraga a Sèn Micel

Laché, Bufon e Marascogn da Soraga, ensema a Conscrit te ceston, Omegn dal bosch e cobia de veies, à portà na cercia de Carnasial tradicional fascian a la defilada del Gran Carnasial Alpin



Al Gran Carnasial Alpin de Sèn Micel se à podù veder ence l Laché, l Bufon e i Marascogn da Soraga.

Sèn Micel - L'era ence i Oraçi da la Slovenia e i Laché de Benedello en domenai ai 27 de firé a Sèn Micel, a la defilada del Gran Carnasial Alpin, endrezada dal Comitato Carnevale San Michele in colaborazion col MUCGT (Musei degli Usi e Costumi della Gente Trentina).

Le manifestazion per l Gran Carnasial era jà peade via en sabeda ai 26, canche da mese le 3 domesdi aló dal Museo de Sèn Micel i à moscià l video Carnival King of Europe / Carnevale re d'Europa. Semper tel Museo da le 6 domesdi l'é stat fat la inaudazion de la mostra Carnevale nel Tirolo. Fasnacht in Imst, olache apede a dotrei filmac se podea veder le tipiche mascre de Imst, Scheller e Roller, mascre che se à podù veder ence te Fascia, canche del 2006 l'é stat la mostra "Carnascèr. Da la Èlps al Mèr Neigher". Apede cheste l'era fora ence i Matoci de Valfloriana e la facera del Bufon fascian.

En domenai ai 27 inant mesdi i gropes ghesc à podù tor part a la vijita vidada al Museo, e dò duc dessema se se à magnà n piat de pasta per se enjgnar a la gran defilada.

Da mese le doi domesdi l'é pontà demez la defilada, olache se podea veder tedant i gropes ghesc tipiches con guanc de la tradizion del Carnasial taliana e foresta, e dò i ciare che tolea part a la gara del ciar più bel.

Verjea la defilada i Laché de Coredo e Romeno, sobito dò vegnia i Oraçi de la Slovenia. Cheste mascre slovene se spartia te doi sort, i Kurenti e i Kujeki. I Kurenti é regolé sù con pel de animal, i à de gregn corgn, burte facere co la lenga de fora e sche nesc Marascogn i à de gregn bronsins che i fasc sonar a temp de musega. I Kujeki enveze l'é na mascre dassen zevila, i à de bie guanc rencuré, facera da bel e na gran capa a semicerchie duta fiorida.

Dò l grop di Oraçi vegnia l grop di Laché de Benedello, te la provinzia de Modena. Chisc i é regolé sù con guanc encolorii e i à na gran capa spiza da fiores, sche nosc Bufon. Dò i Laché vegn n grop de cobie, le femene é regolate de ros e i omegn de bianch con ite per anter valch macia encolorida. Chest grop da Benedello defilaa con picui pasc a temp de musega e ite per anter i Laché col ciapel a ponta se fermaa a balar.

Tinultima l'era ence l grop de Soraga, con te dant l Laché, cater Marascogn e l Bufon, chel bricon che seghitaa a jir a ge seccar a chele belote touse da Benedello. Tedò le mascre vida l'era doi Omegn dal bosch, che i à sperdù jù gregn e picoi che ge vardaa a la defilada. L'era ence n conscrit te ceston, che rodolaa anter la jent che no la capia coche la era che chela veiata se tegnisse l fi te ceston. Junsom l'era ence na bela cobia de veiac, ence se chel veiat l'era mingol deribolent e l se tolea sot n brac valch jona tousa, ma ruua pa ben sobito la veiata col bachet a ge la ensegnar a so om... e ence a le touse!

Seraa la part de le mascre tipiche n grop da Varignano, frazion de Arco. Chest grop era dassen gustegol, i seghitaa a ciantar e a se la grignar, e i metea na bela legrezza a duta la jent che vardaa la defilada.

Dò chisc gropes tipiches defilaa duc i ciare alegoriches de la Piana Rotaliana che se à jià dotrei bele cope. Ence se l temp no à didà e l'è pievet endana la defilada, l'é stat dassen na giornada piena de legrezza. E scheche se disc: a n'autra più bela!

L Grop de le Mascre de Soraga



Ence i Laché rué da Benedello, te la provinzia de Modena, à moscià soe cape spize da fiores che recorda chele de le mascre fasciane.